

671.1431
078
:6

永年縣志

胡景桂題籤

永年縣志卷三十六

知縣事江陰夏詒鈺續纂

人物傳

列女下

陳君相妻喬氏年二十四歲夫亡遺孤甫週歲飲泣鞠
育紡織供讀書事舅姑孝舅姑相繼病篤日夜侍湯藥
焚香虔禱請以身代夫姪其功其信少孤貧氏撫如已
出守節三十六年乾隆二十六年旌表

教文炳妻李氏年二十九歲夫故姑因子喪成疾氏抑
哀承順得親歡心翁病廢供膳如子及翁姑棄世葬祭

三全具元
卷之三十一
一
盡禮訓二子成立後長孫馭恭十四歲入庠氏年七十
歲卒乾隆三十一年 旌表

李之茂妻孔氏年二十二歲夫亡遺孤方週歲家素貧
舅姑年老紡績以給後爲子徽娶董氏未半載而徽亡
董氏年十九歲無所出欲遣之歸董氏不飲食者三晝
夜乃從其志事孀姑盡孝家益貧諸事盡力務得歡心
乾隆三十七年孔氏年七十二歲守節五十年董氏年
五十歲守節三十二年並於三十九年 旌表

李籐妻楊氏年十九歲夫亡家貧遺孤幼備歷艱辛撫
之成立年七十八歲卒守節五十九年乾隆四十年

旌表

程維新妻閻氏年二十七歲夫故無近族可嗣姑屢勸改適氏矢死靡他越八年堂弟生員君弼生子憐其苦志以次子思義嗣年甫週歲氏恩勤撫恤及長授讀績聲與書聲相應祖翁兄弟三俱有喪不能葬氏解囊使各門無停櫬里黨交稱守節四十三年乾隆四十一年旌表

劉崇儒妻李氏年二十六歲夫故痛甚即引刀自裁被鄰婦勸止始強進飲食家貧甚氏上事孀姑下撫幼子嘗月夜紡績以給甘旨至隆冬手足皸裂弗恤子國珍

遺腹子國瑞均成立守節六十一年乾隆四十二年

旌表

張維垣妻曹氏歸後自知有病妨生育恐夫絕嗣勸夫
納妾徐氏生子一視如己出曹氏年三十歲夫故痛絕
半日方甦水漿不入口者三日念遺孤在抱始強飲食
徐氏年二十五歲笑不見齒者三年曹氏病衣不解帶
食必親嘗教督孤子嚴課諸孫廷瑞入邑庠乾隆二十
六年曹氏年六十七歲卒守節三十九年四十一年徐
氏年七十七歲守節五十三年並於四十二年 旌表

楊士傑妻張氏夫病三年扶持未嘗少懈迨病危夫曰

家貧子弱汝宜自計氏曰有尊嫜之家法在嚙指出血
自誓夫故氏年二十五歲遺孤甫週歲恩勤撫育子七
齡卽今就傳俾克成立乾隆四十二年守節三十五年
與姑姑楊端妻郝氏同於四十三年 旌表

孫光烈妻時氏年少夫亡遺孤幼殷勤撫育訓以義方
子孫皆恪遵禮教乾隆四十六年 旌表

饒士毅妻李氏年二十九歲夫亡痛不欲生念親老子
幼乃強飲食家貧窘嘗月夜紡績至冬不輟以孝養舅
姑遺孤端甫六齡又遺腹生子靖殷勤教養俾克成立
年九十一歲卒乾隆四十七年 旌表

高金煥妻趙氏于歸三年夫故氏年二十歲無子孝事
舅姑事繼姑尤謹生事葬祭俱竭力從事撫夫姪爲嗣
視如己出娶婦韓氏得顛疾有子弗能養氏撫之成人
守節四十二年乾隆五十三年 旌表

劉梅妻王氏年二十六歲夫故痛絕復蘇者數次誓以
死殉舅姑勉以養老撫幼飲泣從命乃剪髮自誓家貧
勤女工以供甘旨而自啜糟糠子二長四齡次甫五月
均撫之成立守節四十五年乾隆五十四年 旌表

徐成妻韓氏歸三載夫故年十八歲無子舅姑見婦年

幼屢勸改適氏矢死靡他事親孝勤針黹以供甘旨撫

族子爲嗣未週歲恩勤保護無異己出及長督之讀書
成立守節四十五年乾隆五十四年 旌表

施立達妻趙氏夫故氏年二十歲事翁姑孝姑多病日
夜奉事不稍懈夫弟方在抱氏撫之如子舅姑歿典室
以葬夫弟敬勝入邑庠欲授徒以養嫂不可曰吾紡績
猶能餬口無煩汝憂宜力學以求大成守節三十七年
乾隆五十四年 旌表

李芥妻白氏年二十四夫亡家貧遺孤未週歲氏痛切
瀕死者數念翁姑已老竭力紡績以致孝養撫孤繼賢
成立孫玠列膠庠守節六十二年卒嘉慶二年 旌表

天年身示 卷之三十一 四
鄴永盛妻李氏歸一年夫亡年十八歲翁姑屢勸改適
氏曰婦人從一而終婦而不終安所謂婦孝事翁姑每
慰之曰有婦在如子在勿悲傷也撫嗣子恩義有加訓
以勤學舅歿事姑彌謹氏病篤姑大痛曰苦哉汝之節
尙未伸也氏曰吾自守節而已不求伸也謂其子勿以
我死而懈志汝能成名庶慰父母於泉壤守節三十三
年嘉慶六年 旌表

馬源妻王氏夫故年二十八歲舅姑年老多病湯藥必
親嘗舅姑歿典衣營葬夫弟二幼爲之經營婚娶撫遺
孤教養兼盡視姪猶子訓之讀書入邑庠守節四十九

年嘉慶十年 旌表

程梓妻白氏年二十三歲夫故遺孤三齡孝事舅姑夙夜無違命治家勤儉撫子成立嘉慶二十二年 旌表

程光榮妻尤氏年二十歲夫亡無嗣家貧甚族人欲奪其志以死自誓撫姪見龍爲嗣嘉慶十六年卒守節四十年 旌表

林烜妻胡氏年二十六歲夫故貧甚勤紡織以奉舅姑子昌基幼勗以勤學舉道光乙酉科選拔守節三十六年道光元年 旌表

孫大文繼妻王氏年二十八歲夫故子甫七齡事姑以

孝聞善治家馭下嚴而有恩撫前子如已出教以義方
攀龍武舉見龍入邑庠從龍入成均守節四十九年卒
道光二年 旌表

溫玉乾妻王氏讀書明大義于歸三年夫故年十九歲
舅姑在堂乃以奉養爲己任翁歿破產營葬嗣子欽愛
如已出七歲卽授四書十歲始就外傳臨歿囑子婦曰
善事爾祖母必視我在時爲加隆守節三十三年道光
七年 旌表

李塲妻季氏年二十七歲夫亡無子痛不欲生念翁姑
尙在乃止家貧翁姑病撤瑱環購求良藥願以身代及

卒即欲自盡族中勸以夫弟年幼忍不視其成立即氏
飲泣聽命撫養成立入邑庠守節三十六年道光十四
年旌表

武烈妻趙氏宣化鎮君子堡把總趙宏勳之女幼熟經
書達大義十九歲于歸事舅姑以孝聞姑張氏疾手奉
湯藥滌厠踰晝夜不假寐嘗中夜露禱于庭得寒嗽病
歲暮輒發至既老而無悔烈小試屢北氏勸就外傳而
自課諸子口授指畫訓以六經四子書如是者六七年
烈游庠後即染瘟疾醫藥無效或謂以口吮胸汗出則
愈病者愈而吮者必病氏曰果爾死且不恤病奚辭遂

吮之烈終不起氏亦一病幾危時年二十九歲翁猶在
堂氏上事衰翁下撫諸孤豐於養親而嗇於自奉邑有
名師夏蔭軒先生使子往受學脫簪珥以助膏火迨翁
捐館舍家益貧晝操作夜紡績每通夕不寐嘗自製冬
衣綴以敝葛雖當子通籍後荆布如故親族有以緩急
告者則傾資不恤迄今武母祠義塾皆節縮甘旨之所
成也子澄清汝清進士河清廩貢生孫曾亦蕃盛氏年
九十五歲卒道光二十二年 旌表

連鵬程妻李氏武生李憲章女十七歲于歸逾年夫亡

遺腹生子長慶氏事親至孝躬勤紡績教子讀書入鄰

庠守節五十三年卒道光二十三年 旌表

單養本妻趙氏趙廷壅女十五歲于歸越月夫亡有勸其改適者正色拒絕之立夫兄養智子人憲爲嗣視如己出讀書入邑庠道光二十八年 旌表

傅朝昌妻張氏歸三載夫亡年二十二歲事舅姑以孝

稱翁病廢侍湯藥十餘年不倦無子夫弟朝選以所生

子嗣尋亡又六年復以子襄嗣之朝選夫婦繼卒家益

落氏撫子與姪如一紡績以供讀書不足則典質佐之

襄中咸豐七年舉人氏守節五十五年道光二十八年

旌表

李豁然妻楊氏康熙十五年二十一歲夫亡家貧衰姑
多病日夜侍湯藥子尊賢娶王氏三十九年王氏年二
十二歲尊賢又亡遺孤一王氏與姑同撫幼子俾克成
立乾隆四十一年王氏卒守節七十六年四十二年楊
氏卒守節一百有一年以九十餘歲之寡媳奉一百餘
歲之孀姑一門雙節咸豐二年 旌表

馮扳妻武氏二十九歲夫亡舅姑在堂家貧甚拮据營
養迨歿殯葬如禮攜前子就食母家嘉慶二十二年卒
守節三十七年咸豐二年 旌表

冀之湘妻王氏年二十四歲夫故無子殯葬盡禮事舅

姑盡孝紡績以供甘旨撫嗣子成立嘉慶十九年守節
二十二年卒咸豐二年 旌表

劉鸚鳴妻梁氏夫故年二十六誓以死殉絕食累日族
中以親老勸乃起奉杖履舅姑有疾默禱以身代立夫
姪爲嗣愛如己出孫浩舉人道光十年守節四十年卒
咸豐二年 旌表

苗健妻武氏年二十八歲夫亡無子氏通孝經事翁至
謹翁病焚香籲天請以身代守節七十年卒咸豐二年
旌表

孫承烈妻盧氏年二十二歲夫亡事姑四十餘年未嘗

少懈撫前子如已出教養成立守節六十一年知府沈
濤以栢舟矢節表其門咸豐二年 旌表

傅伸妻侯氏夫亡年二十七歲誓以死殉念親老乃止
竭誠奉養舅姑幾忘其無子守節五十八年卒咸豐二
年 旌表

連鵬年繼妻胡氏年二十四歲夫亡事舅姑孝撫前子
如已出勤儉紡績無間寒暑守節五十七年咸豐二年
旌表

祁鎬妻楊氏歸鎬一年夫故氏年十八歲姑歿舅老冬
病甘旨湯藥皆氏十指所給始終不怠守節五十六年